

## San Pablo Filipos vɯ'ejoopo pa'inare chu'o tocha saosi'ea'me

*Chu'o saosi'ea'me*

<sup>1</sup> Chu'u, Pablo, Timoteona'me, Jesucristo'te cho'oche cho'okainapi, musanukonare Filipos vɯ'ejoopo pa'inare Jesucristo'te cuasaju jovosinajeju Dios neenare ũcuanukore ija'ova utija'ova tocha saome, musanukonare chũ'unana'me ũcuanare cho'oche cho'okainare. <sup>2</sup> Mai Ja'ku Diona'me Maire Paaku Jesucristoji musanukona rekoñoãna re'oja'che pa'iche'te cho'okaiju na re'oja'che pa'ijũ'u.

*Jesure cuasanare Pablo Diore sêekaiu pa'isi'ere kuamu*

<sup>3</sup> Musanukona re'oja'che pa'iche'te cuasani chu'u Cuasaku'te Diore, "Re'orepamu, Ja'ku", chiiu pa'ikumu chu'u. <sup>4-5</sup> Musanukonapi Repau'te apecuasarumu pi irumujatu'ka chekuna pãipi Jesucristo'te cuasache kuachu'ore asaju paapu chini cuhama'ñe ja'me cho'okaiche'te cuasaku musanukonare sêekani si'arumu pojoku sêekaiu pa'ikumu chu'u Repau'te. <sup>6</sup> Dios musanukonare si'arumu na'a re'oja'che paapu chini cho'okaiu pa'imu. Jesucristo jo'e raiumucusejatu'ka Repau'ji cuhama'ñe cho'okaiuna musanukona re'oja'che pa'iju, pi'niñetu'ka cho'uju pa'ijache masimu chu'u. <sup>7</sup> Chu'upi musanukonare jã'aja'ñe cuasato ruu re'omu. Musanukona Diore ja'me re'oja'che cho'okaicojñonare, ruu chiiu chu'u rekocho oimu. Chu'u ivu'e pãi chẽavu'ere pa'iu chekurumu chu'upi ku'iu Jesucristo'te cuasache kuachu'ore chu'vaku panijẽ'e musanukonare ũcua

oiu pa'ija'mu. <sup>8</sup> Jesucristoji oiu cho'okaiuna chu'u musanukonare ũcuanukore ruu oiu ñauache cuasache masimu Dios. <sup>9</sup> Ūcuachi'a musanukonapi sãĩñechi'a si'arumu na'a ruu oiju Repau chu'ojẽ'e na'a ruu masiju re'oja'che pa'imasia'ju chini Diore sėekaiu pa'imu chu'u. <sup>10</sup> Jã'aja'ñe pani cuasa, "Iepi na'a re'omu", chini masiju si'arumu na'a ruu re'oja'che cho'uju Cristo jo'e rairumujatu'ka cu'achejẽ'e cho'oma'ñe re'oja'chechi'a cho'uju pa'ijanaa'me musanukona. <sup>11</sup> Jesucristoji cho'okaiuna musanukonapi re'oja'chere si'ache cho'uju pa'ito pãĩ ña Diore, "Ruu Re'okuji peore Masiu'mu mu'u", chijju pojojanaa'me.

*Cristo chiiche cho'okaiju* pa'iche'te kuamu

<sup>12</sup> Chu'u majapãijana, ie masijũ'u: Chu'upi si'ache cu'ache cho'ocojño'una pãĩ chura Jesucristo'te cuasache kuachu'o na'a ruu jainuko asaju pa'ime. <sup>13</sup> Chu'u Cristo neekujeku pãĩ chėavu'e pa'iche, pãĩ chũ'uku vu'e pa'inana'me chekuna pãĩ icheja pa'ina ũcuanuko masime. <sup>14</sup> Ūcuachi'a mai majapãijana icheja pa'ina jainuko chu'u pãĩ chėavu'e pa'iche'te ña, vaju'chuche jo'kasõ Maire Paakuni Dioni na'a ruu cuasajuna Ūcuauji cho'okaiuna Repau chu'o na'a ruu chu'vaju pa'inaa'me.

<sup>15</sup> Pãĩ te'ena chekuna neere tuu paañu chini cuasaju ũcuachi'a chekunare re'oja'che cho'ocheja'chere na'a ruu re'oja'che cho'ocojñoñu chini Cristo pa'iche'te chu'vaju pa'ime. Ūcuarepaa'me jã'a. Chekunata'ni re'oja'che cho'oñu chini cuasaju chu'vaju pa'ime. <sup>16</sup> Repana re'oja'che cho'oñu chini cuasaju chu'vana Diopi chu'uni ivu'ere pãĩ chėavu'ere pa'iu Cristo'te cuasache kuachu'ore chu'vaa'ku chini jo'kauna masiju chu'ure cuasaju pãire chu'vaju pa'ijuasome. <sup>17</sup> Chekunata'ni, ũcuarepa cho'omanajeju te'ena re'oja'che cutucojñoñu

chini Cristo pa'iche'te kɯame. Ũcuachi'a chɯ'uni pāi chēavɯ'e pa'ikɯni na'a rɯa pa'icu'ache cho'oñu chini chɯ'vame.

<sup>18</sup> Jā'ata'ni jā'a cuasama'mɯ chɯ'ɯ. Re'oja'che cuasanapi jā'apāani ũcuarepa cho'omana chɯ'vatojē'e Cristo pa'iche asame pāi. Jā'ajekɯna pojomɯ chɯ'ɯ. Ũcuachi'a iere masakɯ jo'e na'a rɯa pojoja'mɯ chɯ'ɯ.

<sup>19</sup> Mɯsanɯkonapi Dioni cuasajɯ sēekaijɯna Jesucristo Rekochoji cho'okaiɯna chɯ'ɯ cu'ache cho'ocojñoñe re'oja'che pani etajaija'mɯ chɯ'ɯ. <sup>20</sup> Chɯ'ɯpi cho'oa'kɯ

chini Dios jo'kasi'ere vajɯchɯma'ñe masi cho'okɯ pasa chiimɯ chɯ'ɯ, pāipi chɯ'ɯ cho'oche'te ña, chɯ'ɯpi ũcua vajɯɯ pa'itojē'e ũcuachi'a chuenisorujē'e Cristoni si'arɯmɯ pojojɯ, “Rɯa Masiɯ'mɯ mɯ'ɯ”, chiijɯ masia'jɯ chini. <sup>21</sup> Chɯ'ɯ vajɯɯ pa'irɯmɯna Cristo chiichechi'a cho'okɯ pojokɯ pa'ija'mɯ chɯ'ɯ. Chɯ'ɯpi jūnisoru na'a re'oja'che ti'jñeja'mɯ chɯ'ɯre. <sup>22</sup> Jā'ata'ni chɯ'ɯ

na'a jeerɯmɯ vajɯɯ pani Repaɯ'te na'a rɯa cho'oche cho'okaiɯ pa'ire'omɯ. Jā'ajekɯna chɯ'ɯ chēajañejē'e vesɯmɯ. <sup>23</sup> Ka'chamajña chiimɯ chɯ'ɯ. Jūnisoro chiimɯ chɯ'ɯ, sani Cristona'me ai pasa chini. Jā'aja'ñepi na'a re'omɯ chɯ'ɯre. <sup>24</sup> Jā'ata'ni chɯ'ɯpi vajɯɯ pa'iu

mɯsanɯkonare karache'te cho'okaiɯ pa'ito na'a re'omɯ. <sup>25</sup> Jā'are cuasakɯ chɯ'ɯ na'a jeerɯmɯ pa'ijache masimɯ. Pa'iu cho'okaiɯ pa'ija'mɯ chɯ'ɯ mɯsanɯkonapi Dioni na'a masi cuasajɯ, na'a rɯa pojojɯ paapɯ chini.

<sup>26</sup> Jā'aja'ñejekɯna chɯ'ɯpi mɯsanɯkonani jo'e ñara chini sakɯna Repaɯ'te na'a rɯa pojojɯ pa'ijanaa'me mɯsanɯkona.

<sup>27</sup> Si'arɯmɯ re'oja'chechi'a pa'ijɯ Dios chɯ'o Jesucristo pa'iche kɯachɯ'ore cuasana pa'iche pa'ijɯ'ɯ. Jā'aja'ñe pa'ito sani ñani ũcuachi'a mɯsanɯkona pa'iche'te rupɯ asanijē'e masija'mɯ chɯ'ɯ mɯsanɯkona re'oja'che

pa'iche. Ũcuachi'a mʉsanʉkona ũcuate'e cuasajʉ re'oja'che ja'me pa'ijʉ chekʉnapi asa chēa Dioni cuasajʉ jovaajʉ chini Repaʉ chʉ'o chʉ'vajʉ pa'iche masija'mʉ chʉ'ʉ. <sup>28</sup> Ũcuachi'a mʉsanʉkonare cuhenare jmamakarʉjē'e vajʉchʉma'ñe Dios chʉ'o chʉ'vajʉ pa'iche masija'mʉ chʉ'ʉ. Mʉsanʉkona jā'aja'ñe cho'ochē repa'na cho'osojachena'me Diopi cho'okaiʉna mʉsanʉkona pani etajani re'oja'che pa'ijachere ñomʉ repa'ne. <sup>29</sup> Cristo cho'okaisi'ejekʉna Dios maire Repaʉ'te cuasachechi'a jo'kama'ñe Ũcuani cuasajʉ Repaʉ cho'ocojñosi'ēja'che cu'ache cho'ocojñojʉ pa'iche jo'kasi'kʉa'mʉ. <sup>30</sup> Jā'ajekʉna chʉ'ʉpi cu'ache cho'ocojñokʉna mʉsanʉkona aperʉmʉ ñasi'ena'me irʉmʉ asacheja'che cu'ache cho'ocojñojʉ pa'ijʉasome.

## 2

*Cristo Repaʉ* chʉ'ʉñe jo'kaso pāiʉ carūni rani pa'isi'ere kʉamʉ

<sup>1</sup> Cristoji cho'okaiʉna re'oja'che cho'o koka paame mʉsanʉkona. Repaʉji oiʉ cho'okaiʉna rekoñōapi re'oja'che pa'ime mʉsanʉkona. Ũcuachi'a Dios Rekochoji mʉsanʉkonani si'arʉmʉ ja'me pa'iʉna chekʉnare oijʉ cuasame. <sup>2</sup> Jā'aja'ñejekʉna ja'me re'oja'che pa'ijʉ sāiñechi'a oijʉ re'oja'che cho'okaijʉ ũcuate'e cuasajʉ ũcuate'e cho'oñu chiijʉ pa'ijʉ'ʉ. Jā'aja'ñe pa'ito rʉa pojoja'mʉ chʉ'ʉ. <sup>3</sup> Jmamakarʉjē'e, “Na'a rʉa masiʉ'mʉ chʉ'ʉ”, chini chekʉnani cajejañu chini cuasama'ñe, “Ina chʉ'ʉre na'a re'onaa'me”, chiijʉ cuasajʉ pa'ijʉ'ʉ. <sup>4</sup> Te'eʉjē'e meñechi'a cuasama'ñe chekʉnare cuasajʉ oijʉ cho'okaijʉ pa'ijʉ'ʉ.

<sup>5</sup> Jesucristo cuasacheja'che re'oja'che cuasajʉ pa'ijʉ'ʉ.

<sup>6</sup> Ija'che paniasomʉ Repaʉ:

Dios Mamakujeku cunaumure re'oja'che pa'iu  
 chũ'ukuta'ni  
 chũ'uñe jo'kaso rianasomu Repau.

<sup>7</sup> Repau paache re'oja'che jo'ka rani pãioji paaona  
 maija'iu pãiu ainee  
 rupu cho'oche cho'okaiva'u pa'icheja'che paniasomu  
 Repau.

<sup>8</sup> Pãiu pa'iu Re'okuta'ni, “Inare na'a re'okumũ chu'u”,  
 chiima'ñe  
 Puka'ku chũ'uñe'te jachama'ñe cho'oku chuenisoche  
 vajuchoche'te  
 cu'ache cho'osina chuenisocheja'che kurususẽ'verona  
 chuenisoasomu Repau.

<sup>9</sup> Jã'ajekuna Dios Repau'te vaso cunaumuna jo'e mua  
 ũcuauna'me  
 pãire ũcuanukore chũ'ua'ku chini kueñe ñoosomu.

<sup>10-11</sup> Cheja pa'inana'me cunaumu pa'inana'me vati toa  
 pa'inapi Repauni ũcuanuko vajuchoju,  
 “Jesucristo peore Paakuji Masiu'mu”, chiiju masia'ju  
 chini  
 jo'kaasomu Dios Repau'te Jesure.  
 Jã'ajekuna Puka'ku Dios jã'aja'ñe cho'osi'ku rua pojoco-  
 jñoku pa'imu.

*Jesure cuasana miañeja'ñe pa'iche'te kuamu*

<sup>12</sup> Chu'u cuasana, musanukona chu'u chũ'uñe  
 asa jachama'ñe rua jeerumu cho'oju panicuame.  
 Jã'ata'ni chu'u ja'me pa'irumuchi'a cho'oju  
 pa'ima'ñe chu'u peorumujẽ'e ũcua na'a rua cho'oju  
 pa'ijũ'u. Musanukona rekoñoãpi vajuchoju peore  
 cho'ore'ochetu'ka cuhasoma'ñe masi cho'oju pa'ijũ'u,  
 pani etajani ja'me re'oja'che pañu chini. <sup>13</sup> Diaomu  
 maire Cho'okaiku. Maipi Repau chiiche'te re'oja'che

cho'ouakuna cho'omasiju cho'oju paapu chini cho'okaimu maire.

<sup>14</sup> Peore musanukona cho'oche ke'reju cavama'ne cho'oju pa'ijũ'u. <sup>15</sup> Musanukonapi jā'aja'ne pa'ito pāi musanukonare ña, “Cu'ache cho'ome ina”, chiimanejanaa'me re'oja'chechi'a pa'ijuna. Ūcuachi'a Dios chíi pa'iche pa'iju, pāi si'ache ruu tĩne cu'ache cho'ona pa'icheja pa'inata'ni jmamakarujẽ'e cu'achejẽ'e cho'oma'ne re'oja'che pa'ijũ'u. Repanare chijachejaja'che cu'ache pa'inani re'oja'che pa'inapi ja'me pa'iju chijachejare ma'jñoko miañeja'ne re'oja'che cho'o ñoju pa'ijũ'u. <sup>16</sup> Dios chu'o re'oja'che pa'iche kuachu'ore cuasaju chekunani kujaju pa'ijũ'u. Jā'aja'ne cho'oju pa'ito Cristo jo'e raiumucusena musanukona re'oja'che pa'isi'e ruu pojokũ kujaja'mu chu'u, “Chu'vate'emanesi'kuu'mu chu'u repanare”, chini cuasaku. <sup>17</sup> Jā'ata'ni chu'u musanukonare Repauni cuasaju jovoajũ chini chu'vakũ chuenisonijẽ'e ũcua pojoja'mu, musanukonapi Repaunte cuasanajeju pojoju pa'ijuna. <sup>18</sup> Jā'ajekuna chu'upi pojokũ pa'iana musanukona ũcuaja'che pojoju pa'ijũ'u.

*Timoteona'me Epafrodito pa'iche'te kuumu*

<sup>19</sup> Maire Paaku Jesupi chiito Timoteo'te musanukona pa'ichejana na'mi saora chiimu chu'u, musanukona re'oja'che pa'iche'te ñajani ra kuana asa vajura chini. <sup>20</sup> Chu'u cuasacheja'che musanukonare oiu re'oja'che cho'okasa chini cuasaku cheku te'eujẽ'e peomu. Timoteochi'aa'mu chu'u cuasacheja'che musanukonare oiu cuasaku. <sup>21</sup> Chekuna ũcuanuko repa chiichechi'a cuasaju Jesucristo chiicheta'ni cuasamanaa'me. <sup>22</sup> Musanukona repa Timoteo re'oja'che pa'iche masime. Chu'una'me Jesucristo'te

cuasache kuachu'ore masi chu'vaku puka'kure cho'okaicheja'che ja'me re'oja'che cho'okaiu pa'iku'mu repau chu'ure. <sup>23</sup> Jã'ajekuna chu'ure cho'ojachere asa masi, teana musanukona pa'ichejana saora chiimu chu'u repau'te. <sup>24</sup> Maire Paakuji chiito chu'urepauji ivu'e pã chẽavu'e na'mi eta musanukonare sani ñara chiimu chu'u.

<sup>25</sup> Ūcuachi'a chu'u cuasato mai majapãiuja'iu'te Epafrodite musanukona pa'ichejana jo'e co'choche chiimu. Musanukonapi chu'uni kuiraa'ku chini repau'te raorena chekuna rua ñsetota'ni ūcuachu'una'me pa'iu Dios chu'o chu'vaku pa'imu repau. <sup>26</sup> Musanukonare ūcuankore rua oiũ ñara chiimu repau. Ūcuachi'a repau ravu jũ'isi'e musanukona asasi'ere asa sumava'u pa'imu repau. <sup>27</sup> Rua jũ'iu jũnisora'asi'kuamũ repau. Jã'ata'ni Diopi oiũ cho'okaiuna vajucuhasi'kuamũ repau. Repau'techi'a oima'ñe chu'urejatu'ka oiũ cho'okaisi'kuamũ Dios, chu'uni cu'ache ti'jñeuna suma'ñe pa'iva'uni na'a rua cu'ache ti'jñeuna suma'ñe cuasaku otare oiũ pa'imanea'ku chini. <sup>28</sup> Jã'ajekuna repau'te na'mi saora chiimu chu'u musanukonapi ña pojoju pa'ijuna chu'ujẽ'e ūcuamakarũ sumava'u pasa chini. <sup>29</sup> Maire Paakuni cuasaku mai majapãiuja'iujekuna pojoju re'oja'che cho'okaijũ'u repau'te. Repau pa'icheja'che pa'inare ūcuankore chiiju pojoju pa'ijũ'u. <sup>30</sup> Cristoni cho'ochete cho'okaiũ jũnisora'asi'kuamũ repau, musanukonare cho'okaicu'ache'te chu'uni rani cho'okaiũ.

## 3

*Jesu Cristo chiiche masi cho'okaina pa'iche'te kuamu*

<sup>1</sup> Chura, chu'u majapãijana, Maire Paakuji musanukonani paakuna pojoju pa'ijũ'u, chiimu chu'u. Chu'u aperumu i'kaku tochasi'ere musanukonapi jo'e asato re'omu. Jã'ajekuna tocha ca'nasoma'ñe ũcuare i'kaku tochamu chu'u.

<sup>2</sup> Ñarepaju pa'ijũ'u musanukonani jamuchai kokaneenaja'ñe pa'iju pã ca'ni chutoneenapi jikomu chã'tiro pa'ica'niru chuto tuacojñoñe chũ'unapi cacu'omanea'ju. <sup>3</sup> Pãi Jesurejẽ'e cuasama'ñe rupũ sẽ'sevuchi'a circuncisión cho'ocojñoña Dios neenama'me. Maipi Dios Rekochoji cho'okaiuna Jesucristoni cuasaju jovo vaju Dioni pojoju, "Ruã vesume chukuna", chiinapi Dios neenaa'me. <sup>4</sup> Sẽ'sevuchi'a re'oja'che cho'oju Dioni re'oja'che ja'me pa'ire'oto chu'u jã'ajamajñarũã cho'ocheji Repau'te ruã re'oja'che ja'me pa'ira'amũ.

Jã'ajamajñarũã cho'oku aineesi'kujeku pã chu'u pa'iche'te ñato ruã re'oja'che pa'ikũ'mu chu'u. <sup>5</sup> Israelpãijeku ochorepaumucujña pa'ikũji jikora'muru chã'tiru pa'ica'niru chuto tuacojñosi'kuã'mu chu'u. Benjaminvãijeku hebreorepau'mu chu'u. ũcuachi'a fariseopãijeku Dios aperumu chũ'u jo'kasi'e ruã re'oja'che cho'oku aineeku pa'isi'kuã'mu chu'u. <sup>6</sup> Dios chiiche'te cho'okaineeku Jesure cuasanare tuha Repau'te cuasache'te ũseku vaiche chũ'uku pa'isi'kuã'mu chu'u. ũcuachi'a Dios aperumu chũ'u jo'kasi'e chu'ure peore cho'ore'ochetu'ka masi cho'oku pa'isi'kuã'mu chu'u.

<sup>7</sup> Peore jã'a chu'u aperumu, "Ruã re'omu ie", chiiu cuasasi'e irumu Cristoni cuasaku, "Pechoe'me jã'a", chiiu cuasamu chu'u. <sup>8</sup> Chura, "Cheke peore peoche'me", chini cuasa, "Jesucristo'te chu'ure Paaku'te cuasachechi'aa'me re'oche", chiiu cuasaku'mu chu'u. Na'a ruã re'oja'chere chiiu Repau'ni cuasaku



jovo, cheke chũ'uni chĩ'ca pa'icheja'che pa'ina pe-ore s̃jososi'kua'mu chũ'u. <sup>9</sup> Cristona'me re'oja'che pasa chini cuasaku Repau'te jovosi'kua'mu chũ'u. Aperumu Dios chũ'u jo'kasi'ere te'eu cho'oku re'oja'che pa'ito karamu. Jã'ajekuna Diopi cho'okaiuna ruu re'oja'che pasa chini jovosi'kua'mu chũ'u. <sup>10</sup> Cristo pa'iche'te na'a ruu masira chiimu chũ'u. Chuenisuna Repau'te Vasosi'kupi Peore Masiuji Diopi cho'okaiuna Cristo cu'ache cho'ocojñosi'kuta'ni ũcua re'oja'che panyasomu. Chũ'u ũcuaja'che cu'ache cho'ocojñonijẽ'e ũcuauji cho'okaiuna re'oja'che pasa chiimu chũ'u. Repau chuenisosi'eja'che chuenisonijẽ'e chũ'upi meñe ũcuani isija'mu. <sup>11</sup> Jã'aja'ñe peore cho'ora chiimu ũcuachi'a pãijũ'isina ũcuankoko vajurairumuna vajurasa chiimu chũ'u.

*Jesucristo chũ'u jo'kasi'e masi cho'oche'te kumu*

<sup>12</sup> Dios chiiche cho'oche chuta'a peore masi che'chema'mu chũ'u. Re'oja'che pa'iche chuta'a karamu chũ'ure. Jã'ata'ni che'cheneeku si'arumu na'a ruu re'oja'che pa'iu pa'iku'mu chũ'u, chũ'upi cho'oa'ku chini Jesucristo jo'kasi'ere peore masi cho'ora chini. <sup>13</sup> Asarepajũ'u, chũ'u majapãijana. Chũ'u cuasato chũ'ure jo'kasi'e cho'oche chuta'a karamu. Jã'ata'ni aperumu pa'isi'ejẽ'e cuasama'ñe re'oja'chere na'a ruu cho'omasira chini re'oja'che cho'ochechi'a cuasaku pa'iku'mu chũ'u. <sup>14</sup> Chũ'upi cho'oa'ku chini Dios jo'kasi'ere masi cho'o pi'nira chiimu chũ'u. Jesucristo cho'okaisi'jekuna Dios maini pojoku chẽa isira chiiche'te re'oja'che koora chini peore cho'ore'ochetu'ka Repau chiiche'te cho'oku pa'imu chũ'u.

<sup>15</sup> Maire ũcuankore Diore masi cuasanare jã'aja'ñe cuasache pa'imu. Musankonapi jã'aja'ñe cuasamana

pa'ito Diopi che'choja'mu repare masia'ju chini. <sup>16</sup> Mai che'chesi'e re'oja'che cho'oche ũhasoma'ñe ũcua cho'oju pañu.

<sup>17</sup> Asarepajũ'u, chu'u majapãijana. Chekuna cho'ocheja'che chu'u re'oja'che cho'oche'te ña chẽa ũcuaja'che cho'oju pa'ijũ'u. ũcuachi'a chukuna musanukonare che'chosi'e asa chẽa masi pa'ina pa'iche'te ñaju repana pa'icheja'che pa'ijũ'u. <sup>18</sup> Ie ruarepañoã kuasi'kuamũ chu'u musanukonare. Jã'ata'ni oiũ jo'e ũcuare i'kamũ chu'u. Pãi Jesucristo'te cuasana jainuko Repaũ kurususẽ'vero jũni ro'ikaisi'e cuhena pa'icheja'che pa'iju Repaũ'te cuasamanaja'ñe cu'ache pa'ime. <sup>19</sup> Icheja pa'ichechi'a cuasaju repanare uachechi'a vajuchuache cho'oju pojoju pa'inaa'me repana. Jã'aja'ñe pa'iju cacu'a na'a ruu cu'ache cho'oju cho'osojanaa'me repana. <sup>20</sup> Maita'ni Dios pa'icheja canaa'me ai sani pa'ijanajeju. Maire Paaku Jesucristo repacheja caku rani maire sa re'oja'che paajachere pojoju cha'ame mai. <sup>21</sup> Reparumũ Repaũ peore Paakũji Masikũjekũ mai ca'nivũã re'oja'chechi'a pa'ivesuca'nivũã Repaũ ca'nivuja'ñe sañokaija'mũ, maipi Repaũ ca'nivuja'ñe paaajũ chini, jo'e jũ'imaca'nivũji re'oja'che cho'o koka paaca'nivuja'ñe.

#### 4

*Si'arumũ* pojoju pa'iche'te kumũ

<sup>1</sup> Jã'ajekuna, chu'u majapãijana, chu'u oiũ ñauache cuasana, cacu'ama'ñe ũcua Maire Paakuni masi cuasaju re'oja'che pa'iju pa'ijũ'u. Musanukonare cuasaku ruu pojomũ chu'u. Musanukona re'oja'che pa'iche jã'a chu'u masi cho'osi'e ro'ia'me.

<sup>2</sup> Evodiana'me Síntique'te ũcuamakaru cavaju paapu chini chu'vamũ chu'u, Maire Paakuni cuasaju

majapãiromijanajeju re'oja'che ja'me paapu chini.  
 3 Mu'ure, chu'una'me Maire Paaku'te cho'oché masi cho'okaiku'te, cho'okaiu pa'ijũ'u repanare re'oja'che ja'me paapu chini i'kamũ chu'u. Repana romi ũcuachi'a chu'ure Jesucristo'te cuasache kuachu'ore chu'vakuna ja'me cho'okaisinaa'me, Clementena'me chekuna chu'una'me cho'oché cho'osina. Repana ũcuanũko Dios neephuro utija'ophurona repana mami tochacojñosi'e paame, pa'iche mama pa'ina mami tochacojñosiphurona.

4 Maire Paaku'ji musanũkonani paakuna si'arũmu pojoju pa'ijũ'u. Jo'e ũcuare tochaku i'kara. Pojoju pa'ijũ'u. 5 Pe'keru pa'iju pã chekunare ũcuanũkore re'oja'che cho'o ñoju pa'ijũ'u. Maire Paaku jo'e na'mi raija'mu. 6 Jã'ajekuna musanũkonare cu'ache ti'jñejañe vaju'chuma'ñe cuasaju Dioni si'arũmu s̃eju pa'ijũ'u. Repau cho'okaijachere cuasaju, "Re'orepamu, Ja'ku", chiiju musanũkona chiiche'te s̃eju pa'ijũ'u Repau'te. 7 Jã'aja'ñe cho'oto Dios musanũkona rekoñoãna re'oja'che pa'iche pãijẽ'e vesuche'te cho'okaija'mu. Rekoñoãpi re'oja'che pa'iju cu'ache ti'jñetojẽ'e vaju'chuju sumana pa'imanejanaa'me musanũkona, Jesucristoji ja'me pa'ina.

*Re'oja'che cho'ochéchi'a cuasaju* pa'iche'te kamũ

8 ũcuachi'a ie chu'vamu chu'u musanũkonare, chu'u majapãijanare: Peore re'oja'che pa'iche'te cuasaju pa'ijũ'u, ũcuarepa pa'iche, pojoju pa'iche, re'oja'che cutucojñoñe, pe'keru pa'iche, rũhiñe cho'oché, pã oiju pa'iche, re'oja'che cuasaju pa'ichena'me masi cho'oché. "Peore re'omu ie", chiire'ochéchi'a cuasaju pa'ijũ'u.

9 Chu'u musanũkonare che'chokuna asa chẽasi'e cho'ojũ pa'ijũ'u. ũcuachi'a musanũkona chu'u i'kache asasi'ena'me chu'u cho'oché ñasi'ere ũcuaja'che cho'ojũ

pa'ijũ'u. Jã'aja'ñe cho'oju pa'ito Dios mʉsanʉkonare jo'kama'ñe ja'me pa'ija'mʉ, pãi rekoñoã re'oja'che pa'iche ïsiku.

*Filipos vʉ'ejoopo pa'ina Pablo'te kuri ïsisi'ere kʉamʉ*

<sup>10</sup> Aperʉmʉ mʉsanʉkona chʉ'ure oinata'ni cho'okaicu'akuna reparʉmʉ cho'okaimanesinapi chʉ'uni oiju jo'e cho'okatena ruʉ pojoku Maire Paaku'te, "Re'orepamʉ, Ja'ku", chiiu pa'imʉ chʉ'u. <sup>11</sup> Chʉ'u chiicheji karakuna jã'aja'ñe i'kama'mʉ. Si'arʉmʉ pojoku pa'iche che'chesi'kujekʉ chʉ'uni ũcuʉache ti'jñeto pojoku pa'imʉ chʉ'u. <sup>12</sup> Te'eñoã chʉova'u pa'iu te'eñoã chʉ'u chiiche cajejaiche paaku'mʉ chʉ'u. Chʉ'uni ũcuʉache ti'jñeto pojoku pa'imasimʉ chʉ'u. Chekurʉmʉ chʉ'upi ău karama'ñe paani jã'apãani ăucuhava'u panijẽ'e pojoku pa'imʉ chʉ'u. Chekurʉmʉ cu'amajñarũã karama'ñe paani jã'apãani chʉ'uni ũcuʉache karatojẽ'e pojoku pa'imʉ chʉ'u, si'arʉmʉ pojoku pa'imasikujekʉ. <sup>13</sup> Chʉ'uni ũcuʉache ti'jñeto Cristoji cho'okaiuna koka paamʉ chʉ'u. <sup>14</sup> Jã'ata'ni mʉsanʉkona chʉ'ure karache'te cho'okaiju re'oja'che cho'osinaa'me.

<sup>15</sup> Iere masime mʉsanʉkona: Chʉ'u mʉsanʉkona pa'icheja Macedonia chejapi Jesucristo'te cuasache kʉachʉ'ore chʉ'vajasa chini etarʉmʉ mʉsanʉkona Filipos vʉ'ejoopo pa'iju Jesure cuasakuanupuchi'a kuri ïsinaa'me chʉ'ure. Chʉ'u Dios chʉ'o che'chosi'ere cuasaju, "Re'orepamʉ", chiiju cho'okaisinaa'me mʉsanʉkona. <sup>16</sup> ũcuachi'a chʉ'u Tesalónica vʉ'ejoopo pa'irʉmʉ chʉ'ure karache te'eñoã kuri raosinaa'me mʉsanʉkona. <sup>17</sup> Mʉsanʉkonapi ïsijuna kookʉ pojomu chʉ'u. Kurineema'kuta'ni pojomu chʉ'u. Mʉsanʉkona chʉ'ure rupʉ re'oja'che cho'okaiju pa'iche ro'icojñojañere cuasaku pojomu chʉ'u. <sup>18</sup> Mʉsanʉkona

chũ'uni rakaau chini Epafroditore raosi'ere kooona chura karama'mu chũ'ure. Musanukona chũ'ure raosi'e peore koosi'kũjekũ cajejaichejatũ'ka paamu chũ'ũ chura. Diopi ñato musanukona chũ'ure raosi'e Repauni pojoju pãipi ma'ñare uojuna ma'ñasu che vuochēja'che re'oja'che vuokuna pojomu Repaũ.  
 19 Jã'ajekũna musanukonare Ũcuauji chũ'ũ Cuasakũji Diopi kuiraku musanukonare karache'te peore ñsija'mũ. Jesucristo'te masi cuasanare re'oja'che karama'ñe si'ache ñsiku pa'ikũ'mũ Repaũ.

20 Mai Ja'kũ Dios mai Cuasakũni cuhasoma'ñe si'arũmu pojoju, “Peore Masiũji ruu re'okũ'mũ mu'ũ”, chiiju pañu mai. Jã'aja'ñe paaũ.

*Tocha pi'ni chũ'o saosi'ea'me*

21 Jesucristo'te cuasanajeju Dios neenare ũcuanukore chũ'o sa kuakaijũ'ũ. Musanukonare mai majapãijana chũ'ũna'me pa'ina chũ'o saome. 22 Ijoopo pa'ina pãi Dios neena ũcuanuko chũ'o saome musanukonare. Pãi chũ'ũku vu'e cho'ochē cho'okaina Jesure cuasana ũcuachi'a ruu chũ'o saome musanukonare.

23 Maire Paaku Jesucristoji ũcuanukore rekoñoõna pa'iche re'oja'che cho'okaaũ musanukonapi re'oja'che paapu chini. Jã'aja'ñe paaũ. Re'omũ.

Pablo

Dios Chu'o Kuaphuro

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 4 Mar 2022

87a345ac-83c6-51ad-8750-17a703f38bcc